

ԲԱՅԱՏՐՈՒԹԻՒՆ ԴՊՐՈՑԱԿԱՆ ՀԱՐՑԵՐԻ

Մեր պարբերական մամուլը վերջերս մի քանի անգամ անդրադարձաւ այն հարցի շուրջը, թէ Հոգևոր բարձր իշխանութիւնը շատ անտարբեր է դէպի մեր հոգևոր դրարանոցներից աւարտող սաների բարոյական շահերը, միջոցներ չէ ձեռք առնում օժանդակելու նոցա առաջ Ռուսական համալսարանների դռները բանալու, և խորհուրդ է տալիս անմիջապէս միջոցներ ձեռք առնել մեր կեանքի այդ բացը լրացնելու:

Թէ որքան արդարացի են այդ նկատողութիւնները կերևայ ստորև առաջ բերած պաշտօնական տեղեկութիւններից:

Ռուս սեմինարիստների առաջ համալսարանի որոշ մասնաճիւղերի ուսանողութեան անցնելու դիւրութիւնը տրուելուց յետոյ մի որոշ հոսանք սկսուեցաւ և մեր թեմական դպրոցաւարտների նկատմամբ, նպատակ ունենալով նոյն դիւրութիւնները և նոցա համար ձեռք բերել:

Եւ այս վերջին հոսանքի նախաձեռնութիւնը պատկանում է հոգևոր իշխանութեան:

Ն. Նախիջևանի Հոգևոր Դպրանոցի Հոգաբարձութիւնը, յանձին իւր տեսչի, 1907 թուի նոյեմբ. 13-ին, դիմում է Լուսաւորութեան Տ. Նախարարին մի մանրամասն պատճառաբանած գրութեամբ, խնդրելով իւր դպրանոցի սաների համար դիւրութիւն ուսական համալսարանները մտնելու համար:

1915 թ. յունիս 15-ին Ն. Նախիջևանի թեմ. Առաջնորդը, դիմում է Ն. Սրբութեան, խնդրելով Նորա առանձին ուշադրութիւնը իւր թեմի դպրանոցաւարտ սաներին համալսարան մտնելու դիւրութիւններ ձեռք բերելու համար, հետը ներկայացնելով և այն պատճառաբանած յայտարարութիւնը թեմ. դպրոցի հոգաբարձութեան, որ վերջինս ուղղել էր իրեն 1915 թ. մայիս 24-ին:

Խնդիրը դրուած լինելով եզական տեսակէտից, Հոգևոր բարձր իշխանութիւնն աւելի յարմար է համարուած ընդհանրացնել դիմումը բոլոր թեմական դպրանոցն աւարտածներին համար և ոչ միայն մասնաւորապէս Ն. Նախիջևանի թեմ. դպրանոցի սաներին համար այդպիսի արտօնութիւն ձեռք բերել։ Այդ եզրակացութեան էր յանգած Ս. Էջմիածնի 1915 թ. յունիս 25-ի խորհուրդը։ Այդ տրամադրութեամբ և կազմուած է որոշ հիմունքներով գրութիւն, որ և նախապէս պէտք է ուղարկուէր բոլոր թեմական դպրոցների վարչութիւններին, նոցա տեսակէտն ու կարծիքներն ևս լսելու համար։

Մինչ այդ հանդամանքներն այնպէս են ընթանում, որ սեպտ. 15-ին ստացած մի հեռագրական-տեղեկութիւն բարւոք է համարել տալիս «առ այժմ միայն Ն. Նախիջևանի դպրանոցի համար կատարել դիմումը», մինչև առաւել յաջող պայմաններ ներկայանալը։

Նոյեմբերի 6-ին տեղի ունեցած երկրորդ խորհրդածութիւնն այդ նկատմամբ, Էջմիածնում, ձայների առաւելութեամբ գալիս է այն եզրակացութեան, որ դիմումը պէտք է «կատարել բոլոր թեմական դպրոցների համար այժմեանից», ուստի և թեմական դպրոցների հոգաբարձութիւններին ուղարկուելիք գրութիւնն ուղղել նոցա՝ իրենց եզրակացութիւնը լսելու համար։

Ն. Նախիջևանի փոխանորդը, 1915 թ. նոյեմբ. 19-ի գրութեամբ, առաջ է բերում փաստական և իրաւական հիմունքներով մի գրութիւն, կրկին Ն. Նախիջևանի թեմական Դպրանոցի համար դիմելու «նախապէս, ապա և միւս դպրոցների համար»։

Պետական Դումայի անդամներ մեծ. պ. պ. Միք. Պապաջանեան և Մ. Աջէմեան, 1915 սեպտ. 16 մի նամակով, յանուն Ն. Սրբութեան, խնդրում են դիմումը կատարել «ի սկզբանէ միայն Նոր-Նախիջևանի դպրոցն աւարտողների համար», որպիսի իրաւունքն ստանալուց յետոյ «գիւրին կլինի նաև մնացած թեմական դպրանոցների համար նոյն իրաւունքը խնդրել»։

Այս նկատումներով յանձնարարուում է պ. պ. Աջեմեանին և Պապաջանեանին կարևոր նախապատրաստական դիմումներ անել, ուր պէտք է:— 1916 ապրիլ 30-ին պ. Աջեմեան յայտնում է, որ «հանգամանքները այնպէս դասաւորուեցան, որ ցարդ անկարելի եղաւ այդ առթիւ բոլոր հնարաւոր դռները բաղխել... սակայն յոյս ունիմ, որ մօտ ապագայում հնարաւոր կլինի...»:

1916, մայիս 10-ին յանձնարարուում է Ն. Նախիջևանի փոխանորդ Տ. Գէորգ վարդապետին և Մ. Աջեմեանին «միջնորդութիւն յարուցանել Ն. Նախիջևանի թեմական դպրանոցի համար» և եթէ բարեյաջող կնկատուի «նաև միւս բոլոր դպրանոցների համար» նոցա սաներին համալսարան ընդունելու համար:

Տ. Գէորգ վարդապետը յունիս 8-ին տեղեկութիւն է հաղորդում իւր և պ. Աճեմեանի կատարածի, թէ ինչ դիմումներ են արած Լուսաւորութեան Տ. Նախարարին իրենց յանձնարարած գործի մասին, յղելով և այն դրաւոր զեկուցագիր խնդիրը, որով խնդրել են ընդունել Ն. Նախիջևանի դպրանոցից աւարտողներին համալսարան:

Ահա համառօտակի ուրուագիծն այն քայլերի, դիմումների, որ Հոգևոր իշխանութիւնը կատարել է իւր առաջ դրուած խնդիրը լուծելու համար և որի լուծման մասին մինչև այսօր ստացած տեղեկութիւնները ելքի նկատմամբ, առ այժմ, յոռետես լինելու առիթ չեն տալիս:

Այս բոլորից պարզ է, որ լրագրական նկատողութիւնները Հոգևոր բարձր իշխանութեան անտարբերութեան մասին՝ առ նուազը ոչ մի հիմք չունին, եթէ չասենք, որ ցանկալի էր նախ տեղեկանալ գործի ընթացքին և ապա դատաւիտելու դիմել: Էջմիածինը, ինչպէս տեսնում ենք, շատ աւելի կանուխ է մտածել այդ խնդիրների և նոցա ցանկալի լուծման մասին, քան մեր լրագրական տեղեկատուներն են զարթնել և պարբերական մամուլը անդրադարձել է այդ խնդրին:

Եկեղեցական-ծխական կարօտաւոր դպրոցներին Մ. Աթոռի հովանաւորութեան տակ գտնուած դպրոցական դրամագլխի տոկոսները մասնադրելու գործը դիւրացնելու և աւելի կանոնաւոր հիմքերի վերայ դնելու համար բարւոք համարուեցաւ որոշ փոփոխութիւններ մտցնել բաշխման եղանակի մէջ:

Մինչև այժմ այդ բաշխումը կատարւում էր հոգաբարձութիւնների, համայնքի, առաջնորդի մասնաւոր կամ պաշտօնական առանձնական դիմումների հիման վերայ և նայելով, թէ ունեցած տոկոսներից որչափ գումար էր մնում, ըստ այնմ և առաւել կամ պակաս չափով օգնութիւն էր տրւում դպրոցին:

Ի նկատի ունենալով բաշխման այդ եղանակի ոչ ցանկալի կողմը, որով օգտւում էր առաւելապէս այն դպրոցը, որ նպաստի միջնորդութիւնն աւելի կանուխ էր յարուցել, և կամենալով, որ նպաստն իրօք տրուի կարօտաւոր դպրոցներին, Հայրապետական Դիւանը այս ուսումնական տարուայ վերջը դիմեց բոլոր թեմական առաջնորդներին խնդրելով ներկայացնել իրենց թեմերի ամենից աւելի կարօտաւոր դպրոցների ցուցակը և կարօտութեան չափը. ըստ իրենց հայեցողութեան, իբրև գործին անմիջապէս մօտ եղած դիտողներ:

Թեմակալ առաջնորդների կողմից ներկայացրած ցուցակն այս պատկերն ստացաւ.

1) Երևանի թեմը	70	դպրոցի խնդրում էր	11,850	ր. նպաստ.
2) Ղարաբաղի	» 26	»	3,250	ր. »
3) Վրաստանի	» 19	»	2,050	ր. »
4) Աստրախանի	» 12	»	1,200	ր. »
5) Բեսարաբիայի	» 6	»	400	ր. »
6) Շամախու	» 5	»	1,250	ր. »

Ընդամենը — 155 դպր.

20,000 ր.

Սակայն դպրոցական դրամագլխի $\frac{0}{100}$ -ն ընդամենը տարեկան հասնում էին միայն 14,592 ր.:

Ի նկատի ունենալով, որ մեր դպրոցական դրամագլուխն, ըստ ինքեան, չնչին մեծութիւն է կազմում և

ցանկանալով հետզհետէ նորա աճեցման նպաստել, ցանկալի համարուեցաւ ստացած տարեկան հասոյթի 20⁰/₀ աւելացնել մշտապէս մայր գումարի վերայ, մինչև որոշ, շօշափելի գումար կկազմուի. այսպիսով տարեկան 3000 ռ. յատկացուեցաւ այդ նպատակին, որով մնում էր տրամադրելի գումար միայն 11,592 ռուբլի:

Վերն առաջ բերած ցուցակի մէջ չկան մեր միւս երկու թեմերի, այն է Պարսկաստանի թեմերի խղճուկ դպրոցների ցուցակը. անկախ սորանից քիչ չէ պատահում, որ տարուայ մէջ որ և է անակնկալ պատճառով դիմումներ են լինում Ն. Վեհափառութեան կարօտաւոր դպրոցներին նպաստ տալու խնդրով: Այս բացերն ի նկատի ունենալով այս ուսումնական տարուայ համար Ն. Վեհափառութեան տրամադրութեան տակ է դրուած 1,592 ռուբ., որով մնացած դպրոցների կարիքների համար մնում է տրամադրելի միմիայն 10,000 ռուբլի:

Այս գումարը համաչափ բաշխման սկզբունք ընդունելով դպրոցների չափի և դրամագլխի քանակի յարաբերականը (10,000 : 155), ստացուեցաւ հետևեալ բաշխման աղիւսակը

1) Երևանի թեմի	70	դպրոցի	համար	4970 ռ.
2) Ղարաբաղի »	26	»	»	1846 ռ.
3) Վրաստանի »	19	»	»	1359 ռ.
4) Աստրախանի »	12	»	»	852 ռ.
5) Բեսարաբիայի »	6	»	»	426 ռ.
6) Շամախու »	5	»	»	355 ռ.

Որը կը որ թուերի վերածելով իւրաքանչիւր թեմի համար որոշուեցաւ, ըստ այսմ,—

1) Երևանի թեմ	5000 ռ.
2) Ղարաբաղի »	1900 ռ.
3) Վրաստանի »	1400 ռ.
4) Աստրախանի »	900 ռ.
5) Բեսարաբիայի »	400 ռ.
6) Շամախու »	400 ռ.

Ընդամենը — 10,000 ռ.

Այս մասին արդէն տեղեկութիւն է տրուած ժամանակին իւրաքանչիւր թեմակալ առաջնորդի, որպէսզի նոքա ի նկատի ունենալով իրենց թեմերի համար որոշած դրամի քանակը, ըստ իւրեանց հայեցողութեան բաշխեն ամենից աւելի կարօտաւոր դպրոցներին և նոր ցուցակն ուղարկեն Հայրապետական Դիւանին. որպէսզի ժամանակին ուղարկուի դպրոցների հոգաբարձութեան կամ ում որ պէտք է նոցա յատկացրած գումարները:

Սա մի գործ է, որի հետեանքները կերևան այս ուսումն. տարուայ մէջ և եթէ բաշխման աւելի բանաւոր եղանակ ընդ առաջ կգայ, Հոգևոր իշխանութիւնը չի դանդաղի ինքն ևս ընդ առաջ գնալու դորան, ի նկատի ունենալով միմիայն դպրոցական շահերը և ամենից աւելի կարօտ դպրոցներին օգնած լինելու ձգտումը:

Ցանկալի կլինէր, որ մեր դպրոցական հոգաբարձութիւնները, որոնք յիրաւի կարօտ են և որոնց դպրոցներն առանց դպրոցական դրամագլխի նպաստի չեն կարող կեանք ունենալ, ուսումն. տարուայ վերջը դիմեն իրենց թեմական առաջնորդներին, որպէսզի վերջիններս ևս կարող լինեն ժամանակին լրիւ ցուցակ ներկայացնել կենդրոնին՝ բաշխման գործը դիւրացնելու և արագացնելու համար: